

- Saitual District Sangha Kûtpui 2025 chu Ṭamdilah hman a ni a, hei hi an hman tum 1 na a ni.
- UD&PA Department buatsaih District cheimawi intihsiaknaah Khawzawl, Siaha leh Serchhip te titha zual 3 ah thlan an ni.
- Union Home Minister Amit Shah-a chuan NDA sawrkar chhungin Jammu & Kashmir-ah firfiak chetna avanga thihna chu zaa 70 in a tlahniam tih a sawi.
- Sawrkar laipui chuan thingtlanga chhungkaw vaibelchhe 15.52 te hnenah Jal Jeevan Mission kaltlangin tui thianghlim herhhaw tur a pe tawh.

<><><>

SAITUAL DIST

Saitual District Sangha Kûtpui 2025 chu Ṭamdilah hman a ni a, hei hi an hman tum 1 na a ni.

Saitual District Sangha Kûtpui Organising Committee (SDSKOC) buatsaih Sangha Kutpui hi Fisheries Minister Pu Lalthansangan a hmanpui a, Rural Development Minister, Ṭawi bialtu MLA ni baw, Prof. Lalnilawma chu khual zahawm a ni.

He hunah hian Pu Lalthansanga chuan Mizorama dil hmingthang ber pawl Ṭamdil Saitual District-in an nei chu an vannei hle a ni, a ti. Fisheries Minister chuan department pathum- Forest, Fisheries leh Tourism department tena an enkawl Ṭamdil chu hma a lo sawn zual zel theih nan Tamdil Management Committee chu District Bawrsap kaihhruaina hnuaiah din a ni tih a sawi a, Ṭamdil chu khualzin hipna tha tak a ni tih sawiin, department tin te chu neitu rilru pua tha taka enkawl turin a chah a ni. Fisheries Minister chuan Sangha thar chhuah kawnga intodelh anih theih nan leh ram chereu tur venhimna kawnga hma la a, theih tawp chhuah theuh turin kalkhawmte chu a sawm baw a ni.

Khual zahawm Prof. Lalnilawma pawhin thu sawiin, Saituala Tung ching Association ho tan Horticulture department scheme MIDH hnuaiah brush cutter 10 pek an ni tih a sawi a. Saitual District chuan Tung leh Ṭamdil chu larpui ngei se a duh thu sawiin, hemi kawngah pawh theih tawp chhuahpui a inhuam thu a sawi baw. Prof Lalnilawma chuan kalkhawmte chu hlim taka Sangha Kût hmang turin duhsakna a hlan a ni.

VC

Vawiin Sangha Kûtpui hawnna inkhawm hi Tamdil Wetland Interpretation Centre & Herbarium, Tamdil-ah neih a ni a, Pi Zomuansangi, DFDO, Chairman, SDSKOC chuan a kai hruai a ni. Tamdil-ah hian intihhlimna chi hrang hrang-nghakuai chiah runpui, raw phun lera sangha khai inlaksiak, zip line a uai te a tih theih a, zai rimawi te nen kalkhawm mipuite hian hun hlimawm tak an hmang a ni.

<><><>

RAILWAY MEETING

Assam state Lunding-a Northeastern Frontier Railways Divisional Railway Users Consultative Committee vawiina neihah Bairabi leh Sairang inkar relkawng chu kumin May emaw June thlaah enchhin a ni dawn tih tarlan a ni a, Commision of Railway Safety in a endik dawn a ni.

He Committee-a member ni mek Pu Jonathan Lalremruata, OSD to Chief Minister chuan Mizorama Railways hmasawnna tur thil te meeting ah hian a thlen a, hei bakah hian Sairang leh New Delhi inkar chu mihring phur chi Rail changkang Rajdhani Express tlantir ve tha a tih thu OSD to CM hian a thlen a. A rawtna hi Railway HQ lamah thawn an rem ti a. State capital tin hi Rajdhani-a Delhi thlun zawm vek tum a ni a, churang chuan Sairang to New Delhi pawh hi tihtheih ve ngei beisei a ni.

Meetinga a thu thlen zingah Railway Reservation center leh Parcel Management Service Sairanga dah ve ngei a rawtna pawh an pawm a, Sairang Station commision hunah tih tur a ruahman a ni.

<><><>

WOMEN LEADERSHIP TRAINING

Mizoram State Legal Service Authority leh All Mizoram Women Elected Representative te tangkawp chuan Aizawla I&PR auditorium-ah Capacity building & Leadership Training for elected women representatives an buatsaih a. A hawnna inkhawm hi Chief Minister Pu Lalduhoma chuan a hmanpui.

Thusawiin Chief Minister chuan, ram leh khawtlang hruaitu chu dan hnuaia hnathawk tur a ni a, dan a hriat ve a ngai thin a ti a. Dan hriatna lama mi a bengvar tawk loh chuan dan kalha thusawi emaw hma han lak mai te a hlauhawm a, mipuite chanvo a humhalhna kawngah te, inrelbawlana lang tlang leh huapzo a kalpui theih nan te a tangkai vek a ni a ti. Hetiang lam training hi Thlan tlin hmeichhiate chauh ni lovin mi zawng zawng mamawh a ni, a ti.

Vawiina thlan tlin hmeichhiate chu hmeichhia zawng zawngte aiawhtu an ni a. Hmeichhiate tihchakna leh an hamthatna lamah hmalaknaah pawh sawrkar tibengvartu ni se. A tulna apianga hma la turin sawrkar a inkau reng a ni, a ti.

All Mizoram Elected Women Represenrative President Pi R. Zomuanpuiin he hun hi kaihruaiin Mizoram chanchina dai tawh lo tur, Mizoram state cabinet Minister atana hmeichhia dah hmasa bertu Pu Lalduhoma hi an chhuang a, a thil tih hian hmeichhiate a tilawm a ni, a ti.

Mizoram State Legal Service Authority Member Secy Pu Vincent Lalrokima pawhin thu sawiin, an hmalakna chanchin tlangpui a tarlang a, a mamawhtu mipuite tanpui turin kan inpeih reng a ni, a ti.

<><><>

CHAMPHAI

Mizoram sawrkar flagship programme Ban a Kaih hnuaia Thlai thar lei kalpui mekah tun thla ni 13 thleng khan Champhai District chhunga sawhthing chingtu mi 834 te hnenah sawhthing quintal 4510 man cheng vaibelchhe 2 leh nuai 25 pek chhuah a ni tawh.

Buffer Stock tura Sairang Godown a thawn tawh Sawhthing quintal 2216.69 man cheng vaibelchhe 1 leh nuai 10 pek chhuah hmabak a la awm bawk. Tun dinhmunah Secondary Collection Center 8 ah sawhthing quintal 3616 dah khawm mek a ni.

Hemi chungchang hi vawiina Champhai District Agriculture Marketing Committee (DAMC) buatsaih, Champhai District chhunga Thlai thar leina hmun - Secondary Collection Center leh Cluster Society te tana Sawhthing lei chungchang inhrihhriatna neih ah tarlan a niin he hun pawimawh tak hi District Education Training Hall, Kahrawt Vengah buatsaih a ni.

He hun hi Asst District Agriculture Officer Pu Vanlalnunpuia, (ADAO) in a kaihruai a. Sawhthing lei tura sawrkar hmalakna te, a hralh chhuah leh a lak khawm chungchanga tihdan tha te sawifiahin, zawhna leh chhanna hun hlawkthlak tak hman a ni bawk a ni.

Sensitization Programme-ah hian Secondary Collection Center viltu Nodal Officer te, Secondary Collection Center leh an hnuaia Cluster Society aiawhte an tel a ni.

<><><>

UD&PA

Urban Development & Poverty Alleviation (UD&PA) Department buatsaih District cheimawi intihsiaknaah Khawzawl, Siaha leh Serchhip te tittha zual 3 ah thlan an ni.

Lawmman latute hi cheng nuai 50 theuh pek niin intihsiakna tel district 6 - Champhai, Hnahthial, Kolasib, Lawngtlai, Mamit leh Saitual te hnenah cheng nuai 2 theuh pek an ni bawk.

Lawmman semna pual hian vawiin khan I&PR Conference Hall ah hun buatsaih a ni a, UD&PA Minister Pu K.Sapdanga chuan he hun hi a hmanpui a. District hrang hranga chei mawi kawnga lawmman la tute a lawmpui thu sawiin lawmman la pha lo te pawh UD&PA dept atanga fund awm ang ang te hmangin district tih chang tlun nan hmalak zel tum a nih tur thu a sawi.

Intihsiakna hi nikum december ni 17 atanga kumin february ni 26 chhung khan neih a ni a. Hemi chhung hian district tiin khawpui chei mawi leh thawm that hna an thawk a. Kumin February ni 28 khan district tinin Detailed Project Presentation pe in, endikna tehfung hrang hrang hmanga endik a ni.

<><><>

CS

Chhim lam tlawha thang mek, Chief Secy Pu Khilli Ram Meena chuan vawiin khan Siahaa MADC Forest Conference Hall ah Siaha District-a Head of office te a kawm a.

Chief Secretary chuan Siaha District dinhmun tlangpui endik tura kal a nih thu sawiin, Inkalpawhna kawng tha tawk lo chu veiawm a tih thu a tarlan bakah kawng siam hnathawk leh enkawltute chu tan la thar turin a chah bawk a ni. Hmasawn chak turin inkalpawhna tha a pawimawh hle ani ati bawk.

Chief Secretary chuan zirna leh kawng engkimah Siaha District tan hmasawwna tur a tam hle tih a tarlang a. Zirna chu kawng engkima hmasawwna pawimawh ber ani ati. Ruihlo do kawngah Siaha District chu Ramri hnaih a awm a nih avangin Excise & Narcotics Department, Assam Rifles leh Police te tangkawpa ngawrh leh zual a tanrual angai hle ani ati bawk.

Pu Khilli Ram Meena hian he thutkhawm zawh ah Chief Executive Member, MADC Office a tlawh nghal bawk a ni.

<><><>

MANIPUR ISSUE

Vawiin khan Aizawla Mizo Zirlai Pawl Pisapui-ah; MZP hruaitute kaihhruaina hnuaiah Hmar Students’ Association (HSA) leh Siamsinpawlpi (SSPP) hruaituten Joint Meeting an nei a. Manipura Hmar leh Zomi inkar buaina kal zelah, Mizoramah buaina a kan kai zel loh nan leh remna a awm theih nan hmalak ho zel dan tur sawiho a ni.

Meeting hi MZP President H. Lalthianghliman a kaihruai a, hemi chungchanga thuchhuah intawm an siamah Zofate inkarah inpumkhatna a awm theih nan hmalakho zel tha an ti tih an sawi a, Manipur Zofate inkara buaina avanga, Hmar Students’ Association (HSA) ten, Zomi’ta tan pawm harsa tak thuchhuah a siam avanga rilru na leh thlabar an awm avangin meeting-ah hian HSA hruaitute chuan mipuite hnenah ngaihdam an dil a. Hemi avanga Siamsinpawlpi (SSPP)-in Police station pathum a FIR an lo thehluh tawh chu hnuhdawh an remti bawk.

Vawiin vek khan Zofa Global Network thuchhuah siamin, buaina chhuak chungchang ngaihtuah hian nizan khan Central Committee Meeting an nei a. Zomi leh Hmar inkara buaina pawl an tih thu sawiin, an inkarah remna awm thuai se a duh tak zet an ti a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihlak leh chhiar theih a dah a ni.

Naktuk zing dar 7 leh a chanve-ah Chanchinthar hi puan leh a ni ang.

<><><>

MSPMC

Mizoram State Project Monitoring Committee General Body Meeting vawi 5-na, kum 2025 atana meeting hmasa ber ni bawk chu Planning & Programme Implementation Department Committee Room-ah vawiin khan neih a ni a. Vice Chairman Pu R. Lal Rinawman meeting hi a kaihruai a ni.

He hunah hian, kum 2024 chhunga MSPMC-in Project hrang hrang 38 alo endik tawh hmalakna leh hnathawh dan thlirletna leh hrihlhiahna hun hman a ni a. Heng hmalakna a tanga hmalakzui zel na tur rela sawihona hun hmangin, kum thar atana inrelbawl na leh hmalakna kalpui dan tur pawimawh tak tak te rel a ni.

MSPMC Member Term hi kum 1 a ni a, February, 2025 thleng kha a kum khat-na niin March thlan atang hian kum 2-na Term intanin, kum 2025 atan hian Committee Member 28 an awm a ni.

<><><>

UNION HM

Union Home Minister Amit Shah-a chuan NDA sawrkar chhungin Jammu & Kashmir-ah firfiak chetna avanga thihna chu zaa 70 in a tlahniam tih a sawi. Vawiina Rajya Sabha inkhawmah he thu hi sawiin Pu Shaha chuan J&K ah hian firfiakte chetna pawh a tlahniam nasa hle a ti a. Narendra Modia sawrkar chuan firfiakte lakah zahngaihna nei loin chak tak in hma ala tih a sawi a. Kum 10 chhungin ramchhung venhimna lam nasa taka thamchak a nih thu sawiin khawl thiamna pawh hman uar zel anih thu a sawi a ni.

<><><>

JJM

Sawrkar laipui chuan thingtlanga chhungkaw vaibelchhe 15.52 te hnenah Jal Jeevan Mission kaltlangin tui thianghlam herhhaw tur a pe tawh. Vawiina Jal Jeevan Mission

atana Demands for Grants sawihonaah Union Jal Shakti Minister C R Patil chuan he thu his sawiin kum 2019 ah Jal Jeevan Mission bul tan a nih thu sawiin hetih hunlai hian thingtlanga chhungkaw vaibelchhe 3 vel chauhin tui thianghlim an dawng tih a sawi a. Jal Jeevan Mission hmalakna avangin kumtina naupang nuai 1 sing 3 sang 6 thihna pumpelh anih thu a sawi a ni.

Union Minister chuan tui thianghlim mipuiten an dawn tam theih nan sawrkar lapui budget ah pawh nasa tihpun niin UPA sawrkar aiin a let li laiin an ti pung tawh tih a sawi bawk a ni.

Pu Patil-a thusawi zawh hian Jal Shakti Ministry ten kum 2025-26 chhunga an sum hman tur chu house in a pass zui a ni.

<><><>

TB

Kumina chhung ngeia TB umbo turin sawrkar chuan chak takin hma a la mek. Unin Minister of State for Health Anupriya Patel chuan vawiin Lok Sabha inkhawmah he thu hi sawiin TB vei zat hi zaa 17.7 laiin a tlahniam tawh a ti a. Kum 2015 ah TB vei mi nuai 1 zela 237 ni thin chu kum 2023 ah chuan 195 ah a tlahniam tawh tih a sawi a. TB avanga thi zat pawh kum 2015 aiin 2023 ah chuan zaa 21 in a tlahniam tawh tih a sawi a ni.

<><><>